



**TERTIB ACARA KEBAKTIAN MINGGU
GKPS P.BULAN-RESORT POLONIA MEDAN**

Minggu EXAUDI, 24 MEI 2020

(Itangihon Tuhan do Dilo-Dilo ni Halak na Porsaya)

Live streaming: www.gkpspadangbulan.com/tv

Tata Ibadah: <http://www.gkpspadangbulan.com/tatib>



1. Votum – Introitus – Tonggo

P. Riap ma hita jongjong

Ibagas goran ni Naibata Bapa, pakon Tuhan Jesus Kristus ampa Tonduy Napansing, sitompa langit pakon tanoh on. Amen.

Lape sidea mardilo domma Hubalosi, marsahap ope sidea domma Hutangihon. Haleluya, haleluya, haleluya.

K. (mandodingkon Haleluya, haleluya, haleluya)

P.Martonggo ma hita! Ham Tuhan Naibata Bapanami, na tongtong sirsir manangihon dilo-dilo ni haganupan jolma na porsaya Bamu. Tenger do uhurnami, tongtong do ipardiateihon Ham pargoluhannami, anjaha ikawahkon Ham do hanami mandopakkon sagala na masa. Sorapkon Ham ma Tonduy-Mu Na Pansing hu bagas uhurnami, ase riap hanami marsombah anjaha manangihon hata-Mu, ase lambin sintong janah pitah haporsayaonnami hubani Jesus Kristus Sipaluah hanami. Holong ma atei-Mu, paeleng Ham ma pinggol-Mu manangihon tonggonami on. Amen!

(hundul kuria)

2. Mandoding 302. Puji Hita Naibatanta (1-3)

1. Puji hita Naibatanta, puji hita Anak-Niin,
Puji hita ge Tonduy-Ni Sitolu Sada do in
Haleluya, haleluya, Sitolu Sada do in

2. Puji hita Raja surga, Tuhan ni manisia
Puji hita Raja 'Greja, bai ganup dunia on
Haleluya, haleluya, bai ganup dunia on

3. Haleluya isombahkon, na porsaya hu Bamu
Bai arian pakon borngin, idodingkon hu Bamu
Haleluya, haleluya, idodingkon hu Bamu

3. Mambasa Titah

P. Tangar hita gantih ni Titah na sapuluh in, aima na tarsurat bani **Rom 12:1-2:**”. Ai pe, hupaingat ma nasiam sanina marhitei idop ni uhur ni Naibata, ondoskon nasiam ma angkula nasiam gabe galangan na manggoluh, na susi anjaha na hinarosuhkon ni Naibata, in ma parsombahon nasiam na maruhur! Anjaha ulang ma sarupa nasiam pakon dunia on, tapi mubah ma marhitei habayuon ni uhur, ase boi nasiam manimbangi atap aha do rosuh ni uhur ni Naibata, ai ma na madear, harusuh ampa na gokan dear. **Riap ma hita mangindo!**

K. Ham Tuhan Naibata, pargogohi Ham ma ahu mangkorjahon titah-Mu ai. Amen.

4. Mandoding Hal. 235. Na Mungkab do Surga

1. Na mungkab do surga, iben aha do
Ibaen na roh Jesus mengungkap bamu
Ibaen na roh Jesus mengungkap bamu

2. Itaron dousamu, i Golgata in;
Ijin do salosei ganup utangmin
Ijin do salosei ganup utangmin

3. Antong , O tonduy hu, bai Jesus ho roh;
Ai malas uhur-Ni manjalohon ho.
Ai malas uhur -Ni manjalohon ho .

5. Hasasapan ni dousa

P. Riap ma hita jongjong

Martonggo ma hita, sopotkon hita ma dousanta hubani Tuhan Naibata. Ham Tuhan Naibata Bapanami, Sitompa hanami pakon haganup isi ni dunia on. Dear do haganupan itompa janah iramotkon Ham jadi-jadian-Mu. Gariada Ambilan Na Madear na marisi haluahon ampa hagoluhan in pe isuruh Ham do ase isaksihon hanami hubani ganup na tinompa-Mu in. Ambah ni ai, hajengeson ni dunia na tinompa-Mu ronsi kelestarian

lingkungan hidupnami pe iparentahkon Ham do ase ijaga, ihargai, janah iramotkon hanami. Bani ganup ondos-ondos-Mu in Tuhan, gati do lang martanggungjawab hanami mandalankonsi. Hurang do gogoh ampa kemampuannami laho manramotkon ampa melestarihon goluh na madear in. Gati do lang barani hanami marpambahenan ase jongjong keadilan, pardameian ampa kelestarian lingkungan hidup i tengah-tongahnami. Bani haganupan in Tuhan, sasap Ham ma dousanami, anju, paruhuri, janah pargogohi Ham ma hanami ase marhitei hanami, kuria-Mu roh torsani goluh i tanoh on bahen hasangapon ni Goran-Mu, ampa malas ni uhur bennami. Ibagas goran ni Anak-Mu Jesus Kristus ipindo hanami on. Amen.

P.Tangar anjaha haporsayai hita ma Hata ni Naibata, bagah-bagah pasal hasasapan ni dousa.

Ia na mangkaholongi hita, anjaha na paluahkon hita humbani dousanta marhitei daroh-Ni, na manjadihon hita gabe harajaon hamalimon bani Naibata Bapa-Ni. Hasangapon ma bani Naibata I babou! Amen.

K. Amen. (hundul kuria)

6. Mandoding 453. Pitah Ham Tuhan (1-2)

1. Pitah Ham Tuhan, hatundalan na toguh.
Humbai ganup paruntolon na itanoh on.
Bani haganup pardalanan, pitah Ham panjaga na gogoh.
Ondos ma Tuhan, hanai on nuan, 'se torsa sadokah goluh on.

2. Tonduy Na Pansing, bere Ham bannami on.
Sai useihon Ham bai uhurnami 'se sintong
Ase dong pargogoh manlawan, kuasa ni dunia na bajan
Ondos ma Tuhan, hanai on nuan, 'se torsa sadokah goluh on.

7. Mambasa sibasaon

P. Tangar hita ma Hata ni Naibata na tarsurat bani Psalmen 27:7-14. Amen
Martuah do na manangar Hata ni Naibata anjaha na marimbagashonsi!

K : Amen

8. Mandoding 102 . Ham Tongtong Ihutkononku (1-3)

1. Ham tong-tong ihutkononku, Jesus Sipagoluh ahu
Seng anjai tadingkononku, ham napaluahkon au
Humbai haganup dousangku, pakon humbai uhur in
Natongtong habiaranku, ibaen pardousaonkin

2. Ai ija ma jumpahan ahu, sada Tuhan songon ham
Namanogunogu ahu bai nasonang songon Ham
Namanaron hamateian lao mangkopkop tonduy hin
Ase masuk au manean ugas sisurungan in

3. Atap aha pe namasa, malas uhur, pusok pe,
Jolomanku na maharga na marholong atei pe'
Ai sadokah au manggoluh, 'ge dob bois bohalhon,
Ningon Ham, o Sipagoluh, pujionku sai tongtong.

9. Hata Haporsayaon

P. Riap ma hita jongjong!

Saksihon hita ma haporsayaonta in, songon na sinaksihon ni haganup halak
na porsaya bani sab tanoh on!

P+J. Ahu porsaya bani Naibata Bapa.....Amen! (hundul kuria)

10. Mandoding 346. Roh Panambari na Gogoh (1-3)

1. Roh Panambari na gogoh, in ma Tuhanta Jesus.
Bai Tuhan in ma hita roh, sai malum ibaen Jesus.
Dear ni in barita in, malas ni uhur bangga in.
Sai ipuji uhurhin Jesus, Jesus, Jesus.

2. Ai domma sasap dousa in ibaen na matei Jesus.
Ai seng be jujuronni in, ibaen holong ni Jesus
Dear ni in barita in, malas ni uhur bangga in.
Sai ipuji uhurhin Jesus, Jesus, Jesus.

3. Na parngit bani goluhkon, ibuat Tuhan Jesus
Antong ganup hasomankin, podas ma roh bai Jesus
Dear ni in barita in, malas ni uhur bangga in.
Sai ipuji uhurhin Jesus, Jesus, Jesus.

11. Ambilan: Mateus 20: 29-34(Pdt.Jan Joner Sinaga,S.Th.)

12. Manggalang: (Roh ma na patumpuhon galangan hu lobei.)

P. Paima ipatumpu hita galanganta, tangar hita ma lobei Hata ni Naibata na gabe onjolan banta laho manggalang, aima na tarsurat bani:

Psalmen 50:23 “Ise na manggalangkon banggal ni uhur, ai do na pasangapkon Ahu, anjaha ise na mardalan ibagas hapintoron, hubani do patalaron-Ku hatuahon-Ku.”

13. Tonggo Galangan – Panutup- Pasu-pasu

P.Riap ma hita jongjong

Martonggo ma hita mangondoskon galanganta hubani Naibata!

Ham Tuhan Naibata Bapanami, Ham do na dob mambere haganup na porlu bani goluhnami. On pe, na roh do hanami hu Bamu martarimakasih anjaha mangkamalashon hata-Mu na dob ijalo hanami. Jalo Ham ma hanami ampa galangan na niondoskonami, na gabe hataridahanni hatarimakasihonami hu Bamu. Pasu-pasu Ham ma galangannami on gabe hadearon ni horja i tongah-tongah ni kuria-Mu. Sai tambahi Ham ma pasu-pasu-Mu, ase lambin margogoh hanami mangkorjahon horja na madear. Ibagas goranni Anak-Mu Jesus Kristus, Tuhan janah Sipaluah hanami. Amen!

K. (Mandodingkon doding galangan)

Marhitei diatei tupa roh do au Tuhan

Mamboban buah ni horja na binereMu

Jesus, Jesus, jalo Ham ma au

Bai hurangni panurdukhu anju Ham ma au

Ham Bapanami na i nagori atas, sai na papansing ma goran-Mu. Sai roh ma harajaon-Mu. Sai saud ma harosuh ni uhur-Mu i nagori tongah on songon na i nagori atas. Bere Ham ma bannami sadari on hagoluhan ari-ari. Sasap Ham ma dousanami songon panasapnami bani dousa ni hasoman na mardousa dompak hanami, Ulang hanami bobai Ham hu parlajouan. Paluah Ham ma hanami humbani pangangou!

(Manoruskon tonggo on marhitei na mandodingkon)

Ai ham do simada harajaon, pakon hagogohon, ampa hasangapon, sadokah ni dokahni. Amen.

P. Paingkatkon (Pengutusan)

Laho ma nasiam, janah “ulang ma surut ringgas ni uhurnasiam, hinsah ma ibagas tonduy, sirsir ma mambalosi Tuhan in.”

Jalo hita ham pasu-pasu humbani Tuhan Naibatanta:

Ipasu-pasu anjaha iparorot Tuhan Naibata ma ham. Isondangkon Tuhanta Naibata ma bohi-Ni hubamu janah maidop ma uhur-Ni mangidah ham. Idompakhon Tuhan Naibata ma bohi-Ni hu bamu janah ipasorap ma damei-Ni bani tonduymu.

K. (mandodingkon) Amen..... Amen..... Amen!